

Transkription von Stadtbucheintrag DAN 1494c

Ort, Datierung: Danzig, 1494-??-??

Signatur: Stadtarchiv Danzig, 300, C, 663, 2r-10v

Inhalt: Rat der Stadt Danzig: Zunftordnung der Reepschläger

In deme namen vnsers Herrenn ame(n) Jn deme Jare der geboert des sülûen Dûszent verhündert
vervnd Negen/tich to instendicheit der boschedenen mannen Meystere des warkes der Repsleger yn
vnszer Stadt fryheit geszeten hebben wy Borgermeistere vnde Radtmanne der Stadt Dantzicke dissze
nageschreûe(nen) artikele denszûlûen to gelaten vnde vorlouet to holden

Jnterste dat nymant thowe szlaen szall dat garne szy denne ersten van deme geswarwen wraker
gewraket

Item allerley Water thowe kleyn effte grot szall men slaen van gûden garne

Jtem ytzlick hûndert wynnynghe , sall hûndert elen langk szyenn

Jtem dat hûndert Weûelinge , szall langk szyen hûndert vademe

Jtem Lothlinen , Lyklynenn , Vischlynnen howsnoer , itzlick stûcke van lx vademen

Jtem Dorschtow xij sznore vp dat stûcke de snoer sall langk sien xxx fademe

Jtem Hûsinge , Marlinge , Sarbanth itczlick sznoer sall hebben xv fade(me)

Jtem so sal nyma(n)t strenghe maken van / oldem thowe , Ock nicht van oldem bynne(n) / vnde de
bûten mith nyen bokleiden , sûnder / gûde getwernde strenghe na der olden ge-/waenheit vnd itzlick sal
sien iiii ele la(n)gk / vnde dat thoemstrick sal szyn ij fadem la(n)gk //

fûrder szall nymandt des warckes wahre / veyle hebben he hebbe denne dat hant-/werk vtgeleret vnd
dat myt sziner hant bewyszet Ock szall nymant des werkes / gebrûken he hebbe denne dat lehen vann /
deme Rade entfangenn /

Jtem off eyn geselle mith synem meister / dar he mede wehre jn twedracht qweme / den szall kein
Meister tosetten , he hebbe denne / de szaken van beiden parten gehoert /

Jtem off eyn lehrknecht synem Meister / entlepe bynnen szynen lere Jaren denn //

szall keyn meister tosetten ane erkenntnis / des Rades /

Jtem eyn Itzlick lehr Iûnge de szal thwe / jar by synem meister lerenn /

Jtem Off ymandt fromdes quême , vnde / vnsze hantwerck geleret hadde , vnd sick / jn anderen
jegenen nicht fromelick ge-/holden hadde , den szal nymandt tosetten bet / szo lange he genochsam

bewysz bringe / wo he van dar gescheden is //

Jtem alle gemakede thowe vnde wahre / de vth anderen Steden hir gebrocht / werdt , mogen de borgere kopen itzlick / to syner nodtrofft , vnd nicht wedder / touorkopenn /

Jtem szo sullen Alle iar gelick andere(n) / ampten thwe Olderlûde ûth erem / wercke durch den Radt gekaren werde(n) / vor den Radt kamen , vnd van deme / Borgermeister tor tydt wesende geedet / werden , vnde desûlûen szolen jn deme / iare alz se Olderlûde szien , van itz-/lickem meister eres werckes j geringe margk vp Martini vpt Radthûsz //

bringen vnd deme kemerer ouerantworten /

Jtem so sal itzlick szyn Segel garn ma-/ken van follen pûnden

Jtem de vnszes werckes Meister werden / wyll , de sal dissze nageschreûene werck-/stûcke maken van szynem egenem henppe / vnde kavelgarne , dat he mith sinem Ehde / sal beholden /

Interste , Dat eine smyte szy van vi dûme(n) //

vnde xv fadem langk /

Jtem eyne Kavelthow v dûmen vnde lx fa-/dem langk /

Jtem eyne Schote van v dûmen vnde / xvi fademe langk /

Jtem wen men to like efte tohope werdt / vorbadet welk broder dar nicht kommet / efte stûnde , de saz thwe schillinge geûenn //

Jtem to deme olden lîcke to graûe , szo sall / beide ma(n) vnde frwe szyn ,vnd to dem / kinde sal syn der Meister ader syne / ehlicke hûsfrwe vnd to deme lehr jûnge(n) / by ij schillingen /

Jtem de Jûngesten szolen dat lieck tho / graûe dregen /

Jtem wen men de broder yn dat werck / vorbadet , yn der stûnde alz sze vorbadet / werden , szo solen sze kamen by ij schill(inge) //

Jtem welk geselle de dar wil meister / werden , de szal eynem Meister eyn Jar / denen , dat he en nicht strafet na erkent-/nisz des werckes Baûen al des Rades /

Jtem welk geselle dat werk wyl heisch(e)n / de sal eine quatertemper touorne heischen / ehr he dat werckstûcke szleydt , Is jdt sake / dat he nicht volfaret , Szo sal he / noch eyne halûe quatertemper heschenn / touorne , wen he syen meisterstûcke ge-/slagen hefft , Szo solen van den iiij oldest(e)n / meisters dat besehen off he ock volfaren / mach //

Jtem wenne de Broders to hope kamen / szo solen de Jûngesten ij schencken , De / sick dar kegen wyll setten , de sal breken / j to(n)ne beer , vnde de den jû(n)gesten ouer-/last deith , de szal desûlûe broke ock geûenn /

Jte(m) welk Meister de deme Anderen syn / gesnide entspenet , De sal geuē ein tonne / behr /

Jtem welk Meister eyne lehr jūnge(n) tosettet / szo szall de lehr jūnge l margk / jn dat wergk geuēn //
//

Jtem welk Broder deme anderen syne(n) Kop-/man entspenet , szall de Raedt de broke / erkennen /

Jte(m) wen de Brodere tosamne kamen vnd / syen vorbadet , szo sal keiner

langhe wehre / by sick dregen men eyne messzer dar he / brodt mach mede snydenn /

Jtem welk Broder deme anderen entgegen / ys mith woerden efte mit werken , de / szall gebraken hebben j tonne beer na er-/kenthnisz der szaken vnd der werke //

Jtem welk Meister de eyne gesellen / wyl tosetten , de szal ersten deme anderen / fragen , dar he aff is gescheden wo he / sick mit em heft entscheiden , by einer / haluē tonne beer /

Jtem szo sal elck meister de daer vasten / draet kopen van den Büren , den szolen / se nicht fürder vt scheren wen xl fa-/dem by pene /

Jtem welck meister de Water thow slaen / de solen dar nehn falsch garne to doen / nemlick to kabelthow Steghe Szmiten //

Schote(n) Dregetreep bogereep Mantels / topreep Bogelynen Würde jmandes / jn diszen stücken befunden de szal eyne / steen wasz gebreken /

Jtem szo sal elck Meister nicht mehr den / ij knechte holden Alz iii gesellenn / vnde ii lehr jūngen /

Item welck geselle de sick szettet kegen / de Meisters mith freuēll de szall / eyne jaer wandern na der szaken gestalt / vnde erkentnisz des Rades //

Jtem welck geselle de dar Meister wil wer-/den de szal synen Bortbreeff haben vnd / woh / he sick mith synem meyster hefft geholdenn / effte he ock echte vnd recht is gebarenn /

Item welck Meister steruēt , Szo szal de frūwe dat Werk dar na man ein jar holdenn / Jtem Nymant szal vp vnszem Wercke / meister werden , he szy denne jhn diszer Stadt / Borger gewordenn //

Jtem Nymant szall kabelgaern dregchen van / vngeswūngenem hempe ock nicht van / littoūschem ader bynnenlendischem hem-/pe by j stein waszs /

Jtem Nymant sall mit sziner wahre / szynes nabers dore vorhengen by iiij / pūnth waszs /

Jtem de den hōkers ere wahre todregenn / solen iiij pūnth waszs brekenn //

Jtem Nymant szal Bastdraet als men / van den Büren koft lenger den xl vadem / scheren , by j stehen wasz /

Alle vorschreuenen Artikel szolen staen to des / Erszamen Rades behach desūluē toūormy-/nern ader toūormehren effte toūorandern /

Jtem szo sullen alle meystere de nhw tor tydt / szyen als nomelicken Lorentz vnger , Matz / ouerbeke ,
Dynnyes raske , Jacob Bekemann / Thomas grote Szymon Vouer , Jacob vosz / hans illiger , Michel
szweder , haqns wynterfelt / Peter Bütke , Peter gerbrecht szullen des Werkes //

to ehrem leuende gebrukenn